

30 peratus atlit mewakili negara pelajar universiti, IPT

Petaling Jaya: Pembabitan aktif atlet negara terdiri dalam kalangan mahasiswa universiti awam (UA) dan institusi pengajian tinggi (IPT) pada kejohanan sukan anjuran Persekutuan Sukan Universiti Dunia (FISU) mampu memberi pendedahan kepada golongan itu pada peringkat dunia.

Presiden Majlis Sukan Universiti Malaysia (MASUM), Prof Datuk Dr Hassan Basri Awang Mat Dahan, berkata untuk kali pertamanya Malaysia menganjurkan kejohanan antarabangsa bagi sukan Woodball pada 2014, Skuasy (2016) dan tahun ini, sebanyak dua kejohanan dunia membabitkan mahasiswa universiti berjaya dianjurkan.

Beliau berkata, inisiatif itu membuktikan Malaysia

mampu menganjurkan sukan bertaraf antarabangsa membabitkan penyertaan mahasiswa dari seluruh dunia sekali gus berupaya meningkatkan kecemerlangan atlet tempatan.

“Penganjuran kejohanan bertaraf antarabangsa bukan sekadar pendedahan untuk menimba pengalaman bagi atlet negara, sebaliknya ia adalah peluang terbaik bagi mahasiswa universiti kita melakar kejayaan pada peringkat dunia.

Inisiatif MASUM menganjurkan kejohanan yang diiktiraf FISU bukanlah mudah memandangkan MASUM perlu mendapatkan kepercayaan daripada badan bersekutu itu untuk pengajuran membabitkan banyak negara dalam satu

kejohanan,” katanya ketika ditemui selepas menghadiri Majlis Dialog FISU-Persekutuan Sukan Universiti Asia (AUSF) 2018 di sini, baru-baru ini.

Mahasiswa mampu bersaing

Sesi dialog itu bertujuan bagi meningkatkan lagi kerjasama antara negara anggota AUSF dan Majlis Sukan Universiti ASEAN (AUSC) dalam memantau perkembangan sukan membabitkan mahasiswa universiti.

Selain itu, sesi dialog yang dihadiri hampir 100 delegasi dari seluruh dunia itu turut mengenal pasti akan kekangan dan halangan negara anggota AUSF dan AUSC agar dapat disesuaikan dengan kadar segera demi masa depan atlet.

Mengulas mengenai pembabitan atlet negara dalam dua temasya sukan besar, Sukan ASIA Palembang, Indonesia 2018 dan Sukan SEA Kuala Lumpur 2017, beliau berkata, lebih 30 peratus atlet yang terbabit ialah mahasiswa UA dan IPT serta pemegang biasiswa sukan Kementerian Pengajian Tinggi (KPT).

“Pembabitan atlet muda dalam temasya sukan besar seperti Sukan SEA dan Sukan ASIA, menjelaskan kemampuan mahasiswa kita untuk bersaing dengan atlet negara lain yang mungkin lebih senior daripada mereka.

“Oleh itu, inisiatif MASUM melalui AUSC dan AUSF mampu mengembangkan lagi potensi bakat mahasiswa kita pada peringkat dunia,” katanya.

Sukan Asian 2018 Palembang, Indonesia

- 102 atlet UA / IPT yang terbabit
- Universiti awam yang terbabit: UPM, UiTM, UKM, UM, UPNM, USM dan UTM
- Institut pengajian tinggi swasta: UniTEN, APU, Universiti HELP, INTI, MMU, Universiti Nilai, Universiti Sunway, Universiti Taylor's, UCSI, UNITAR, CUCMS dan Kolej Linton